

# RI TYOXLAJ MIXA RUK' JUN K'ULANEM

## MATRIMONIOS

### Ri Nab'e Tzij

Rajawaxik che ri ix ix achajilal ke'iloq'oq'ej ri iwixoqilal je' jas uloq'isaxik ri ib'aqil ri ix

### Ri Utz'ib'anik ri Tyoxlaj Pablo chkech ri E'ajefesi'os 5,25-33

<sup>25</sup>E'achajilal, chiloq'oq'ej b'a' ri iwixoqilal jeri' jas uloq'oq'exik ri Komon Tyox kub'an ri Kristo e xujach rib' rumal utoq'ob'isab'al uwach ri are', <sup>26</sup>arech kutyoxarisaj ri e kuch'ajch'ob'ej ri are' ruk' ri ja' e ruk' tzij; <sup>27</sup>rumal rech che are kraj che ch'ajch'oj e saqil chuwach ri Are'; arech man k'o ta jun tz'ilob'inaq chech on jun b'ach'uy chech on jun chik jas uwach, xane tyoxlaj e ch'ajch'ojalaj ri ub'antajik. <sup>28</sup>Jek'uri' jas weri', rajawaxik che ri ix ix achajilal ke'iloq'oq'ej ri iwixoqilal je' jas uloq'isaxik ri ib'aqil ri ix. Jachin kuloq'oq'ej ri rixoqil xas are wi ri are' kuloq'oq'ej rib'. <sup>29</sup>Rumal rech che man k'o ta jun winaq xretzelaj jumul ri ub'aqil; xane kuk'iysaj ri are' e kub'an ri utz chrech. Je' jas kub'an ri Kristo chech ri Ukomon Tyox: <sup>30</sup>La man uj ujtz'aqatil ta ri Ub'aqil? <sup>31</sup>Rumal k'uri' ri achi ke'uya kan ri' ri unan utat e kuyut' na rib' ruk' ri rixoqil e chi ekeb' ri' e jun chi b'aqilal ri': <sup>32</sup>Wa weri' jun nimalaj awatalik, in kwaj kinb'ij weri' puwi' ri Kristo e puwi' ri Komon Utyox. <sup>33</sup>K'atek'uri' kinb'ij weri' chiwech, iwonojel chiloq'oq'ej ri iwixoqilal je' jas uloq'oxik iwib' ri ix e ri ixoqilal nim chrila' wi ri rachajil.

**Are wa' ri Utzij ri Qajaw**

**R/. Katqaq'ijilaj Qajaw**

**Ri B'ix 111,1-9**

**R/.: ;Sib'alaj utz rech ri winaq che kuxib'ij rib' chuwach ri Ajawxel !**

<sup>1</sup>;Aleluya!

;Sib'alaj utz rech ri winaq

che kuxib'ij rib' chuwach ri Ajawxel,

che sib'alaj kraj ri jetaq upixab'!

<sup>2</sup>Ri rija'al, sib'alaj uchuq'ab' ri' chuwachulew,

tewchi'talik ri kija'al ri esuk' taq winaq. **R/.**

<sup>3</sup>Utzil e q'inomal k'o pa ri rachoch,

ri usuk'il pa junalik kjeqi' kanoq.

<sup>4</sup>;Kwa'lajik e kqopqatik pa ri q'equ'm,

jeri' jacha chäj chkech ri esuk' taq anima',

sachb'al mak, ch'uch'uj e suk'il ri are'! **R/.**

<sup>5</sup>Utz rech ri winaq che ktoq'ob'isan wach

e che kuya qajomanik,

e che ruk' suk'il, kusuk'umaj ri jastaq rech:

<sup>6</sup>jayi', mijumul ri' ktzaq chi jumul,

pa junalik na'tisab'al kk'oji' ri suk' winaq. **R/.**

<sup>7</sup>Man kuxib'ij ta rib' chuwach ri jetaq k'ax kpetik;

tikitalik ri ranima',

ukub'am uk'u'x chrech ri Ajawxel,

<sup>8</sup>ujikib'a'm ri ranima', man kuxib'ij ta rib',

pa ri uk'isb'al, keril ri' ri e'uk'ulel pa ri k'ax. **R/.**

<sup>9</sup>Kutunej uya'ik ri jastaq chkech ri meb'a'ib',

ri usuk'il pa junalik kjeqe'ik,

are uchuq'ab' ri uq'ijil. **R/.**

## **Ri Utzalaj Tzij**

**Jochlaj tzij chuxe' kanoq ri Utzalaj Tzij 1 Jn 4,7**

¡Aleluya! ¡Aleluya! **R/.**

Ixloq'alaj chqaloq'oq'ej b'a' chqab'il taq qib' rumal rech, che loq'oq'eb'al uk'u'x ri Dyos e ri jun che k'o ri loq'oq'eb'al uk'u'x xa'lax uloq chi ruk' ri Dyos, e reta'm uwach ri Dyos.

¡Aleluya! **R/.**

## Ri Utzalaj Tzij rech ri Tyoxlaj Xwan 2,1-11

<sup>2</sup>Pa ri urox q'ij chi apanoq, k'o jun k'ulanem pa ri Kana che jun utinimit ri Galile'a, k'atek'uri' k'o ri unan ri Jesus chila'. <sup>2</sup>Xoquje' ksik'ix ri Jesus kuk' ri e'utijoxelab'. <sup>3</sup>K'atek'uri', man kutzaqa ta ri amaja', rumal rech che kk'is ri amaja' rech ri k'ulanem, ri unan ri Jesus kub'ij chrech: «Ri e'are' man k'o ta chi ri kamaja'». <sup>4</sup>Ri Jesus kub'ij chrech: «¿Jas wech in chawech ri at, ixoq? Maja' kopan ri nukajb'al». <sup>5</sup>Ri unan kub'ij chkech ri e'ajpataninelab': «Ronojel ri kub'ij chiwech che kib'ano, chib'ana'». <sup>6</sup>K'o k'ut chila' waqib' ab'aj q'eb'al, che ruk' taq weri', kkich'ajch'ob'ej kib' ri ejudi'o, chjujunal q'eb'al, keb' on oxib' pajib'al upam. <sup>7</sup>Ri Jesus kub'ij chkech: «Chinojisaj we taq q'eb'al ri' chrech joron». Ri e'are' kkinojisaj chi ajsik chrech taq ri q'eb'al. <sup>8</sup>Kub'ij chkech: «K'atek'ut, chanim chik ri' chipak'ej ri joron e chik'ama' ub'i chrech ri rajaw ri wa'im». Ri e'are' kkik'am ub'i chrech. <sup>9</sup>Aretaq chi' ri rajaw ri wa'im kuqumuj nab'e apanoq ri ja' che jalatajinaq chi amaja' –rumal che ri are' man reta'm taj jawije' xel wi ri amaja', k'atek'ut, ri e'ajpataninelab' keta'm jawije' xkesaj wi ri ja'– ri rajaw ri wa'im kusik'ij ri ch'ab' ala, <sup>10</sup>k'atek'uri' kub'ij chrech: «Konojel ri winaq are nab'e kjach ri utz amaja', e aretaq chi' eq'ab'arelab' chi ri winaq are kkijach chi ri man qas ta utz. K'atek'uri', ri at are xak'ol ri utz k'ate' na chanim ri'!». <sup>11</sup>Xa jeri' k'ut, are weri' ri umajib'al taq ri uk'utb'al ri Jesus pa ri Kana jun utinimit ri Galile'a, k'atek'uri' kuk'ut ri uq'ijil e ri e'utijoxelab' kekojon chrech ri are'.

**Are wa' ri Utzij ri Qajaw**

**R/. Katqaq'ijilaj Qajaw**

## **Jun Chik Utzalaj Tzij**

**Jochlaj tzij chuxe' kanoq ri Utzalaj Tzij 19,5**

¡Aleluya! ¡Aleluya! **R/.**

Je', ri achi kuya na kan ri unan e ri utat arech kuk'am rib' ruk' ri rixoqil

¡Aleluya! **R/.**

**Ri Utzalaj tzij rech ri Tyoxlaj Mate'o 19,4-6**

<sup>4</sup>Kub'ij: «¿La man isik'im taj che ri Tikonel k'iysanel, chi pa ri utikb'al uloq ri uwachulew, xe'utik ri e'are' chi achi e chi ixoq, <sup>5</sup>k'atek'uri' xub'ij: Je', ri achi kuya na kan ri unan e ri utat arech kuk'am rib' ruk' ri rixoqil e chi ekeb' kkitunab'a na kib' e xaq ejun b'aqilal chi ri?. <sup>6</sup>Xa jek'uri', ri e'are' man ekeb' ta chi ri', xa ejun b'aqilal chi ri'. Xa je'k'uri', ri junam xutunab'a raqan uq'ab' ri Dyos, man ya'tal ta chrech ri achi kujach uwach».

**Are wa' ri Utzij ri Qajaw**

**R/. Katqaq'ijilaj Qajaw**